



**B**Vdardus in Saxoniam magnis parentibus natus fuit. Itaque Carolus Magnus cum Saxoniam longo bello domuisset, eum quoque inter duodecim eius regionis obsides petiit & accepit. Hunc S. Burckardo Herbipolensi praesuli educandum tradidit. Unde cum sagaci ingenio esset praeditus, in uirum doctissimum & eius Ecclesiae Canonicum euasit. Cum autem postea anno octingentesimo quarto, Harimarus praesul Paderbornensis mortuus esset, ipse omnium consensu in eius locum Episcopus electus est. Episcopus factus templum multo augustius quam prius aedificauit, atque in Galliam profectus S. Liberij &

Valleriani corpora secum retulit, & in sua Ecclesia collocauit. Ibi orando, canendo, legendo, & docendo reliquis exemplo fuit, atque cum S. Meinulpho omnia summo ordine administrauit. Tandem cum magna laude per quadraginta octo annos rebus praesuisset, Anno 852 mortuus, & magna solennitate a suis sepultus est. Anon. Crantz.